

## Юшат лэщатлайт

Хащам ятан округ доватан юшат лэщатлайт. Луң сысэв йи тылщев туп хащас, щипан ертаңа па ищкия йиты унты мосал тэрматыты. Юш тумпийн нови тутат талдайт, хоятат яңхты юшат па лэщатлайт.

Вошатан па куртатан 106 км юш ядпитла. Новый Уренгойн 30 км, Пулцаватан 14 км. Вошат кутан 100 км ядпидала. Там рупатайт Ас потты тылащан питщасайт верты. Ноябрьск-Вынгапуровской юш етшаптаса. Тарко-Сале элты Тарасовской месторождение унты 5 км, ёхан мохты нормал ищи туңа щира лэщатла.

Хоятатан машинан артан яңхты юш Коротчаево-Новый Уренгой 2027-мет талан етшаптада. Ныда-Пангоды юша мосты пормасат тулдайт. Щита юш па ёхан мохты нормат туңа щира лэщатты ураңан хулам тал мосмитад.

Пангоды-Правохеттинской 3,8 км юш па нормат лэщатла.



Хор: stroiteh-msk.ru



Хор: vk.com/popovolegshur

Йи шупел етшаптасэд. Надым-Пулцават 5 км талса, хонна 37 км хащас. Аратадан 47 км мосал верты.

Пулцаватан тохдаң хопат

латты хар унты ялап юш талда. Щи веран аэропорт унты яңхты хоятата кеншак питад, па сора ям юш хуват манты питлат. Хут тал сыс рупата юшат 63% версайт, щит 1428 км.

Там веран кашң пуш антом туп вошаң юшлуд яма верлайт, щит тумпийн куртаң па вошаң юшат кутлалан талдайт. Удалса йи ямашак йил, манты кутэн сора сохнал.

Аллина Тоярова ханшам потар

## «Честный маршрут» хутмет пуш манал

Ямал мув губернатор Дмитрий Артюхов унт дор тылац 18-мет хатадан кашң тал верыдыты яңхапсайл питщалды. Хутмет пушал, лув номас понас, Ноябрьск вош элты олңитты.

Туняд иты лув кашң вошан па куртан хоятат пилан уйтантыйл. Вантдалды, хоты сахат куцдайт рупитлат. Муй хорпи ям верат хоятат улты тахаятан тыйсат. Туняд партыдыйм верат туңа щира версайт муй па антом.

Тамац яңхапса миран шеңк давалда. Ванты, щити порайн кашң хоят верытад лув ёра верал элты инщасты. Щит шеңк ям, лув ясаңд мохты куца пада хойл, ёврая питама верал мохты туңмалад.

## Унт тутат хуратлайт

Там лапатан округ доватан тут хуратты хоятат «Ямалспас» элты рупитлат. Аратадан хутъяң педа хут хоят. Щи веран, па талат пилан артадаман, ин тутан вуйм хар шималшак.

Пуровской районан хулам хар 72,7 га вуйдыса, катн 35 га хуратса. Красноселькупской район – хулам, Надымской район – нял, Ноябрьск – хулам, Тарко-Сале – хулам, Приуральской район – хулам, Лорвош район – хулам, Ямальской район – хулам, Тазовской район – хулам хар. «Ямалспас» тумпийн куртаң па вошаң хоятат ищи нётлат. Тохдаң хоп Ямальской, Надымской, Ноябрьск, Тарко-Сале, Красноселькуп хоша яңхал. Щалта щити тахаятан машинайт па яңхлат, нётлат.

Атом пуснаң вер шималшак улты ураңан, кашң хоятта, хой тутан вуйм унт моштад, мосал 8 (800) 100-94-00 телефон хуват ясаң верты. Щиты яха понасман унтэв шавилэв.

Аллина Тоярова ханшам потарқан

7+

## Щутщаты хара яңхаты

Унт дор тылац нялмет хатд элты яңмет хатд унты Урал Кев лепан «Полярное лето 2024» уйтантопса верла. Щи вер педа улты альпинистат па лапат тал элты лапатхоцъяң тал унты няврэмат тайты хоттэлат Кев доңда нох хуңхты па Кев вур хуват шушидыты вохлайт.

Парщин хот, певалты хот, лэтот, кавартты путат, анат, олты па лаңкисыты хират, арсыр мосты пормасат уйтантопса верты хоятатан иса лэщатман улдат. Кева манты хоятата патан, эда думатты сох туп мосал вутыя.

Лапат сыс щита удман, щутщаты ёх Кев доңал элты кашадалэд муй хорпи нюрам му-

вев хорамаң па лащкам. Илан, Кев сыд хуват па шушидылат, ёнтлат, каслат. Певалты каврам хот юпийн Собь ёхан потам йиңкан ёлхалтылат.

Там уйтантопса Ямал внутренней политика департамент хуват

лэщатман ул. Щутщаты манты ураңан нэмолты сохаптаты ант мосал. Заявка нэпек китаты па ям дыд рув патан вуйман Кев доңлат педа шушматы.

Зоя Куртямова ханшам потар



Хор: Луиза Мифрахова

12+

# Яңмет пуш ияха акатлайт

Ас потты тылащ 20-23-мет хатлатан Пулцават вошан Овс мув шимлаң мир энамты няврэмат «Российский Север» уйтантопсая акатлайт. Яргьяң тал сыс энамты няврэмат хон мув доватан улты регионат элты яха актацдат. Ямал муван 2022-мет тал элты уйтантыдат.

Потарлат па альдат, хоты сахат шоши мир ёх улапса елды туты мосал, ясаң шавиты. Рут ясаң ант уйтты хоятата альты па потарты, муй щиран щи вер соращак верты рахал, там йисан арсыр мутрайт улдат, щи веран нётты ураңан.

Йис улапса шавиты ураңан турамосот проектат ханшлайт па улапсая лоңаллайт. Хащам ятан этнотуризм шеңк такан рупитты питас. Кашң ай куртаң хоят верытал там рупатайл туты па мира эталтыты. Щи веран ай мираң улапса ант сохнаң па елды тула.

Энамты ёх па нэңат, хой лаңхал там уйтантопсая ёхтыдыты, «Молодёжь России» платформа хоца щёхар тылащ 20-мет хатл унты заявка нэпек китаты. Шоши мир няврэмат, 14-35 тада ювам хоятат, щий пилтацияты, ханты мир улапса хорасаң вердан мира эталтытыты.



Хор: Альбина Тярлиня

«Движение Первых» хоца улты мохилув, этноблогерат, ямас ёнтасты па вератты хоятат, ясаң шавиты па елды туты мохет, общественной движенияята лоңам няврэмат.

Камаста ясаң там уйтантопса элты Инесса Олеговна Яунгад ястас, лув там форуман волаң хоята ул. «Там форумат энамты няврэмат яңмет пуш акатдалдув. Яргьяң тал сыс верам рупатаев артадалэв, щалта па «Российский Север» елды улапса посталэв. Там форуман па щи юпи хатлатан шеңк ар рупата верда. Ма кашң пуш Овс мув шимлаң мир энамты няврэмат пилан рупитдам, елды па лаңхадайм, дудн лув ищиты шоши мир улапсаел

елды тусэл, нох адмисэл», – Инесса Яунгад ястас.

Там уйтантопсая пилтацты хоятата мосал анкета нэпек ханшты па нёхты хор верты. Хой талаң тэдан мосты вердал иса туңматлалды, щи хоят вохда. Щи кеша нэпекан китда, айкеданверда.

Вет направлений щиран рупата олтда: этнотуризм, рут ясаң шавиты щир, энамты ёх сообществайт елды туты вер, «Российский Север» медиаресурс верапса па йис улапса туты щир. Росмолодёжь конкурсан нох питты хоятат 1,5 миллион солдува щитлат.

Щишан, пилтацияты, духсаңа ювилдыяты, мойлапсайт щитыдыяты!

Аллина Тоярова  
ханшам потар

## «Йиңкилора» нётты хоятат ёхатсат

Там лапатан овцебыкат тайты хара нётты хоятат мантсат. Щита лув яң хатл улты питлат, пушас верты нётлат.

Щи пушасат лыпийн там пунаң войлудв ант падман улдат. Щит элты каматса ясаң Лазарь Михайлович Еприн ястас, лув «Йиңкилоран» рупитал: «Тамаш нётопса муңева шеңк мосал. Пушас верман

войлудв евр па мойпар элты шавилдув. Нэмомты пеңкаң воятан ант падтапалайт. Тамаш нётопса муңев шеңк мосал».

Энамты няврэмат пушас вертэл тумпийн хонна нёхты хор верты питлат, муй па подкастат вердат, хоты сахат добровольцат Овс мува йилат.

Аллина Тоярова  
ханшам потар



Хор: Юлия Чудинова

## Йи пуш сохаптаты ох элатса

Округев элты СВО ляль харат педа манам хоятлува йи пуш ёпа вуты ох нётапсайл элатты ястаса. Щимащ партапса округ куцаев верас.

Хой уйт дор тылащ олаңмет хатл унты контракт ханшлатас па хутсот щёрас солдувайн сохаптаса, щитат ветсот щёрас солдувайн элты па нётлайт. Сохаптаты охал йи миллион сот щёрас солдувая хойты верал ул. Заявление нэпек атэл ханшты ант мосал.

СВО хоца улты хоятлудв па лув хотэл хоятлал сайлаты ураңан кашң пуш ялап нётапсайт верлайт. Там хатла хутъяң педа вет нётапса рупатая вуйман ул.

Муң па манам мохилудв ёхи лавалдув. Там атам вер сора ат етшал. Дылдан шавиман таядан па тумтак улаты.

Зоя Куртямова ханшам потар

## Леккарат Пулцават вошан актацдат

12+

Унт дор тылащ лапатмет хаталан Пулцават вошан «Арктика 2024. Здоровая цифровизация» уйтантопса верда. Хон мувев ун вошатан па ай куртатан рупитты леккарат хулам хатла округеван актацдат.

Москва, Хон Петра, Екатеринбург, Адлер, Тюмень, Ноябрьск вошат элты ёхатты леккарат, уйтантопсая йиты хоятат уталтаты питлат, еңта пасан суран рупата верат туңмалты потрат тулат. Харсойм па вошаң леккар хотат рупата щир вантты яңхлат. Леккар нэпекат туңа щира лэцатты, компьютер хуват эталталайт. Ялпа тувам пормасатан рупитты уталталайт.

Хоты там уйтантопсайн рупатайл манты питал унт дор тылащ этты газетаятан луңталн.

Зоя Куртямова ханшам потар

## Нётапса хуват юш нэпек лутаты

Нётапса вуты хоятат ад па уятлат, хоты «Морошка» карта рупитал. Улапсаев яммалтыты ураңан кашң хатл молты ялап нётапса вер этал.

Округеван ар ёхтам хоят ул. Шошия улты хоятлува нётты ураңан тамащ нётапса верса. Щимащ карта ёшан тайты хоятат, тохдаң хопа тындышак юш нэпек лутты верытлат.

Хой щёхар тылащ ветхоцъяңмет хатл юпийн холта педа манты лэцатыйл ки, щи нётапса хуват, тамхатл элты ай тахайт потты тылащ хольман педа хутмет хатл унты, там сайтан <https://yamal.aero/> юш нэпек вуты верытал. Ун вошат кутан яңхты нялъяң педа лапат маршруттан нётапсайл рупитал.

Ялпа верам программа велци пуншса. Щит ураңан, юш нэпекат луттыйн, хота муй ант тыйл ки, «Морошка» сайт <https://ek.yanao.ru/> па телефон хуват нётты приложение лыпийн вантаты, ханшаты, иншасаты.

Зоя Куртямова ханшам потар



Хор: abnews.ru

# Арктической велогонка касапса манас

Хацям шутцаты хатлатан «Arctic Bike Trail» касапса ус. Урал кев юш хуват Рай-Из кев унты велосипедан хатмиман манты. Юшад, тыел-тохел хуваталдн, «Профи» категорияйн нялъян километра, «Любители» кольмаң педа хут километра манты мо- сас.

Округ ёх тумпийн, Хон мувев ун вошат элты мойң хоятат ка- сты па ёхтылысат. Нэңат кутан Лорвош район каркам, апраң эвиет мойлаптаты одаң местая- та этсат. Хоты касапса манас, Вероника Дмитриева пидан по- тартсаман.

«Тамащ касапсая ма хулмет пуш ёхатсам. Ийикем, Павел Дмитриев кимет пуш. Тунял лув, лув доват ёх хоятат кутан, кимет местая этас. Ма па кашң тал хатман хулмет, кимет, там пуш одаңмет места вусам. Хольмаң щёрас солкува охан мойдасайм. Ольга Лобанова опем, ищи мин пидэман касты хара хуцсэман. Лув одаң пуш яңхас па касапса соханты пос унты хулмет ёхтас. Нелли Куртямова «Профи» кате- горияйн кимет места вус.

Касапса елпийн муң Пулңават вошан кашң хатл етна пелка велосипедан хатмисув. Рупатая па велосипедан яңхлуд. Хатл сус яңхман, катхощъяң элты хольмаң километра арат унты акмал.

Там пуш товев шеңк хув ус, йиңкал ун па мувев яма ант сорас. Манты юшев еша даварт ус. Нюрм хардал йиңкаңат, хота кеваң, хота воцлах. Тухал йиңк лотлал шанш унты ёхатлат. Тохел касман манмеван шома охан хатмиман нэмолты ант ныса. Ёхлды аялта шушман нумассув: «Тата манман, амуй щиран ид ант ракантсув?!» Пирам, пелңа тэлые. Ёшан хол воцематы кум антом. Щиты щи порсаюв. Хота рэп доңда велосипедлуд даңкра воцкаман

Нюрм хардал йиңкаңат, хота кеваң, хота воцлах.

адсалдуд. Муйкем даварт касты ус, ищипа ям.

Ун вош элты хуващак ман- тыйн, далты дыл шув сы- стам, восты лыптаң юхат ал доймтылат, арсыр хорам лып- тат энамлат, лэпат ванши торн,



«Arctic Bike Trail» касапсая пидтащийм хоятат.



Вероника Дмитриева одаң местая этас.

кев ёхан йиңкал ал лурыйл. Сам лыпийн аматман, щикем кен па ям», – Вероника Дми- триева ястас.

Айлат ёх няврэмата яста- ты утшидам. Телевизор па телефон педа вантман ёдан ал омсаты. Тамащ хошам ям хатлатан камн шушидыяты, ёнтаты, хухатдыяты. Молты хоятата ям нётты верат вераты. Касты харат манты тахаята пидтащаты.

Зоя Куртямова ханшам потар

## Йиңк хоща хурыман уллаты

Луң руваң хатлатан хоятат унал- айд ёлах каншман йиңк хоща нык мандат. Хойтат певалты йиңка доңлат. Няврэмат, антидалан- ащилалан ант ки эсалдайт, сай тахаятан, ханятыман йиңкан пол- щемадат.

Округеван худам тахайн туп певалты рахал: Тарко-Сале вошан Пяко-Пур ёханан, Светлое нэмпи тув Ноябрьскан па Муравленко во- шан парк Культуры шутцаты ха- ран, нэман лэщатам тув лот верман уд. Па куртатан, вошатан, хота

йиңк лотат, туват, лорат, ёханат улдат, певалты ант рахал.

Ал щиты нумастыйн, муй хоты йида. Сора кеша йиңка доңтыла па ёлхалтыла. Йиңка доңты ант эсалды хорат педа хой вантал.

Ун хоятата номпсаңа улты мосал. Ант уйтты пал тахайт элты шома охан йиңка ант наварты. Кутцаман йинщты ота ант доңты, хопа ант омасты, мотор ант сухта- ты. Шеңк руваң хатадан няврэмат ищи па йиңка доңлат. Нын сэман вантты тахаятан ат певалдат.

Ёхан пан питарат сыстама тайты па няр курты, ант мушмалтыты ураңан, лэваса тынаң кев ал сэңкаты, кеванат, ант мо- сты карты шупат наман ал хаяты, нампар ал ёвдаты. Няврэмдын уталтаман таядан, хоты йиңк сыл хоща улты мосал.

Зоя Куртямова ханшам потар



Хор: 89.mchs.gov.ru

## «Хорам хотвол» касапса пуншса

Лорвош районан хулмет пуш «Милый сердцу уголок» хорамаңа лэщатам хотвол пирыты касапса пуншса. Унт дор тылащ нийлхусмет хатл унты заявка нэпекат акатдайт.

Нэман актам комиссия вантты питал, хой хоятат ов хардал луңан сыста- ма па хорамаңа лэщатман тайдалдал. Тал пора сус там касапсайн па луңатла. Хот пуңадан омасты ар- сыр ампарат, гараж, мис па дов хотат, хот нэпе- кат хуват вантдайт. Иса ханшман улдат, муй па антом. Хотвола луңасты мувал иса сыстам, мосаң хот шанш пелакан ант мосты пормасат па нампар керытлдыйл. Кашң щуң валэмада.

Сусан, «Живые традиции» уйтантопсайн ястада, маты куртаң ов хар мет хорамаң. Одаң местая этам хотвол, хотаң хоятлал сот щёрас солкувайн мойлаптадайт. Хус щёрас солкувайң нял мойлапса па лэщатла.

Тунял там касапсайн Ям- курт элты Александр Никола- евич па Вероника Тимофеевна Куртямовоңан нох питсаңан.

Зоя Куртямова ханшам потар



Хор: Вероника Куртямова

# Крым муван ветмет пуш уйтантысат

Кашң тал энамты няврэмат Крым муван «Артек» нәмпи Международной детской центрэн шутцилдылат. «Большая перемена» Всероссийский конкурса пилтащам няврэмат пилан Ямал губернатор Дмитрий Артюхов уйтантыс, няврэмат лэщатам инщасайт хуват потар верас.

Хольмаң па хон мув элты 193 энамты няврэм ёхтас, Россия 68 регион элты лапатсот няврэм пилтащас. Лув кутэдан вет хоят Тарко-Сале па Губкинской элты.

«Там касаспа етшаты едпийн муң кашң пуш ияха актацилув. Кашң пуш вантлам, хоты сахат муң няврэмдув тата верты рупатаед паты унты тулэд. Ямал няврэмдув миллион молтас хоят пилан кассат. Там конкурсан касты па хащты вер – щит волаң



Хор: ЯНАО губернатор пресс-служба

вер. Муң ох адмиман яңхлуд, хун шоши муваң няврэмдув нох питлат», – ЯНАО губернатор Дмитрий Артюхов ястас.

Касаспа хоттэд Тада постам щиран манас. Кашң аляс, потартас, хоты сахат йис улапса, рут мувал, ясңал шавиты па елды туты мосал. Мет ямша-

кат усат па нох питсат Фаина Нарулова па Ульяна Шиндина Тарко-Сале элты. Нох питам 300 няврэм мойлаптаса. Никита Брегида Тарко-Сале элты призерэ йис. «Большая перемена» хоңа улам 5-7 класс няврэмат ураңан волаң мойлапса – щит «Путешествие мечты», поездна

Москва вош элты Владивосток унты манлат.

Ямал Губернатор Дмитрий Артюхов РФ Госсовет хоңа «Молодёжь и дети» куңа рупатайл елды тулды. Лув кашң тал «Большая перемена» хоңа нох питты няврэмат пилан уйтантыс, мойдантыты вохилдылды. 2021-мет талан «Андрей Вилькицкий» ледоколан тутдысайт, 2022-метан Саббета «Ямал СПГ» заводан усат, 2023-метан Ямбургской месторождения яңхсат.

Ветмет пуш тамащ уйтантопса манас. Кашң няврэм ай курт, ун вош элты щий пилтащты верытал. Щишан, яма уталгыты, нын молты вер щиран туты проектлан ханшаты па тамащ уйтантопсаята ищи пилтащияты.

Аллина Тоярова ханшам потар

## Доркурта ялап почта хот туса

Хащам ятан Доркурта ялап почта хот туса, акатса па омасса. Ин кушкепа куртаң ёх аматман щий доңгыты питлат. Курт хуват пушман, аңкармадан па сам аматад.


Каматса ясаң Яна Александровна Минькова (Кельчина) ястас, лув щита рупитал: «Там лапатаң ялап хотэв иса вантсэв, арталасэв. Сусан овал пуншдалды. Лащкам, ветъяң метра молтас. Рупата щиран мосты пормасан иса тэкаптаман улда. Агатман рупатаема яңхты питлам».

Муй нумаслат куртаң хоятат, ищи инщасалдув. «Ин

ялап хотан, кушкепа хоят доңгыты харал уншак питал. Щит шеңк ям. Ант мосал пенсия вуйдыты порайн камн дойты, поталтантыты. Посылкайт вуйдыты порайн ант мосал нумасты, ил ант ат питдан», – Зинаида Толба ястас.

Ин куртаң хоятат хорамаң хота кашң пуш доңгыты питлат, китам айкелдал па пормасдал вуты ураңан. Елды хатлатан ям мосты хотатан па ат тулайт. Щи веран улапса йи ямашак йил.

Аллина Тоярова ханшам потар



Хор: vk.com/popovolegshur


## Муш элты шукащты хоятат ищи верытлат рупитты

2024-мет талан, хоятата рупата каншты служба, муш элты шукащты катсот педа нялъяң кат хоята рупата уйтты нётсат. Рупата каншты федеральной па региональной программадан хуват кашң тал хуламсоткем хоят рупитты питщал.

Щи кеша шеңк ун рупата верла. Кашң хоят инщасла, хота па муй рупата лув лаңхал верты. Тайты муш лавартад элты рупатайн пирыла.

Рупата маты организацияйт щимащ хоятата рупитты харат лэщатлат. Тылащ ёша маты охал окружной бюджет элты нётла. Грант ох щитты касасайн касты рахал.

Мет шопаңа мушаң айлат ёх рупата хушдайт. Муш кашы вера питтыин, номас шакал. Тадаң мир педа лик этал. Атам нопсат пилан утщая ант хащты ураңан, няврэмат уталтыты вохлайт. Хоятата рупата каншты служба округеван улты лапат колледж пилан пилтащман рупитты нэпек ханшсат. Няврэмат пирыты верытлат, муй рупата



Хор: ЯНАО губернатор пресс-служба

педа уталтыты. Щи тумпийн, арсыр уйтантопсаятан, вантопсаятан, еңта пасанатан па мастер-классатан лэщатлайт.

Там пуш рупата хар пирыман хуламхощъяң ярмарка верыдыса. Нялъяң педа кат организация рупитты хоят лавалад. Хуламсот педа ветхощъяң муш элты шукащты хоят ярмарка яхтыдыс.

Муйкем лаварт, ёлан омасты ант мосал. Номас такан верман хоят хоңа этты. Там муван кашң хоят улапсайл тынаң, кашң верам рупата мосмаң.

Зоя Куртямова ханшам потар



Хор: Аллина Тойрова

Каматсы тал сайна Канац пухална муваң нәңхы Никон Николаевич Куйбин пидна яха ёхтыдысам, тамац хансапсы тывас. Никон Николаевич дув яра мув йир ясадна потрал тудды.

**Вос ёх улапса**

Там муватна хув пораятна олта питсув. Катра матты омиңилам-ащиңилам потар ширна канац хоца муң йирёв митхуйи олилимал. Шци порайна пентыяйна талдат, кадаңна яңхлат.

Хопты мосаят тута ным мув педа яңхлат. Нохач хоц яңхлат. Канац куцайи удтал лампа. Пардаят: «Тута манты мосал». Мосаят: худат, нёхаят тута мосл.

Талта сахат па олңац таха Берёзова моса матты кадаңна яңхыдытёл. Шцита Берёзова хоца ёхтапталдал, шцилта олңац ант манлат.

Каслыман парта йилат. Шцилта па молятна дёлдаят. Пулңават восна мосайдал ёхтапталдал. Шцита хыйладал.

**Туң юс эват**

Талта сахат Канац пухал эват Пулңават педа туң юс тайсув. Муң ацев лов таяс.

Талта вуталта манл, вуд «трасса» педа питл.

Итта муң еңитман яңхлук. Туң юс тай ус. Вутл таха эват манлан. Тута газовая труба супи вунслэн па кев юсна питлан.

**Нопталдыты панат эват**

Катра эват улты ханты панат. Там нопталды пандал, ма вулды ювман эват Канац пухална улам нәңхэтна тайсаят.

Длапатнаңкна колхоз «Красная звезда» ус. Саранатна Корчага пан тайты питса.

Там пухал пуляң улты пан Пролетарский, таланты юхат ищи сарандална вуса.

Хантэт па Канац пухар тайсат. Наңк пан ус, шцита велпасласат. Мохсаң ураңна худмет пан тайсув.

Шци порайна мур урхотатна олдат. Муң ацев Наңк пан эват Ютлук нәмпи лотна велпаслаты китыдыса. Ютлук Канац пухлаң нәңхэт педа ус.

(Елды па ул)

Герман Наков ханшам потар

**Вой леккарата нётапса дёщатса**

Велци рупатая лоңтын вой леккарат, йи пуш ёша вуты нётапса охан маты питдайт. Фельдшер – ветсот шёрас солкувайн, институт етшам па ун леккара рупитты хоят – длапатсот шёрас солкувайн сохаптада. Хон мувев па регионат кутан, округ вой леккарата маты охал мет уна хойл.

Нётапса ох вуты заявление нэпек ханштын, хоята мосал: вой леккара уталтым высший муй па средний образование нэпек ёшан тайты, округ ветеринарии центр пидан рупитты договор

ханшты па ясаң маты, худам тал шци рупатайн рупитты, хольмаң вет тал элты уншак ант улты.

Нётапса сохаптаты елпийн, мет олда вантла, хоты хоят рупитал. Там пуш рупатая лоңам хут

айдат ёх, ищи верытлат шимац ох ёша пайтты. Рупатая лоңты юпийн, тал сус, хун кум шитла, заявление ханшты рахал.

«Округева вой леккарат иса мослат. Рупитты хоятлук шавиман тайдаллук, ещалт йилук па муй шир тайлук, шциты нётлук. Велци рупитты питтын улты хот ох сохаптаты, луматты сох, дётот, мосты пормас дутты, ох иса шци мосал. Тамац нётапса маты питла ки, шеңк ям», – ЯНАО ветеринария служба куца ху Евгений Попов ятас.

Зоя Куртямова ханшам потар



Хор: ЯНАО губернатор пресс-служба

**Самлук хошилат, сэмъийнклук этлдылат**

Там длапатам атом айкедан ёхатсаюв. 21-мет хатадан Евдокия Андреевна Нёмысова там цунаң мувев иса я хайсалды.

Аратал ханты миран дув шеңк яма уйтса. Дув удмал хуват ашкуда няврэмат ураңан ханты ясаң уталдыты нэпекат ханшас. Евдокия Андреевна верам водаң рупатайл хуват приуральской, шурышкарской, казымской диалектаң нэпекат этлысат.

Дув муң самлуван веккеша хащал. Муң потрапсаева, ханшапсаева ар ошаң номас, юр па шём понас. Шци ураңан там хатл унты муң верытлук хонна ханты яцев тайты па елды туты.

Хоят педа шеңк вешкат, потраң водаң нэцев

хащам талатан «Просвещение» нэпек эсалты хот пидан рупитас. Куш нуптал 89-мет тала кердас. Шци тумпийн Совет старейшин ХМАО-Югра хоца лоңман ус.

Уйтты хоятладан учёной нэ тумпийн уйтла, муй хорпи дув каркам, тус ёшаң. Ай ёдаң ханты пормасат лувела па рутлада ёнтыдыс, сэвам вай сэвилдыс, сак картыдыс...

Наталья Ивановна эвел па рутлад номаслад ат такапталат. Муң нын пиданан ищи шук тудув. Евдокия Андреевна нумадмилёв, сэмъийнкев муңхилдылэв...



# Вуца, хатдые!



Хор: Альбина Тырлина

(Олаң шупал №29 луңгалн)

Ёхан питара ши сысан лов тац айдта ванамас.

– Алпа, йиңк иньщты тый ёхатсат, – Юра апщел, ловат педа вантман, ястас па ёхан йиңк элты яйл юпийн вуты манты питас. – Мосаң, па па пелка вуншты лаңхалат.

Яйңан пуңалн талаң няд лов манас. Ешауд дый ид волысат па елды аңкармасат. Щалта холдыена йиңка охалсат, ёхан па пелка вуншты питсат. Хув таха элты лов сохат иса вуртыя таласам патарох карты хорасат тайсат, матты ки дый шаншвурдалн хатл ид ханемас.

Шиңанца яйңан вуты килсаңан, ёхан питар хуват нохдышак мантсаңан, лудан ловат худэна верам йиңк хоца ант питты. Ши щирэдн ялпа певалты вуянтсаңан.

– Наң па муя ёлта хацсан? – Толя апщел иньщмас, ёхан йиңк элты вуты манмалн.

Юра айдта вутышак хатас па такан ладман, ратхар пуңда ид омпас.

– Наң па муй курэн мушмалтсэн?

– Анта. Потам ёхан йиңқан кур дондам яха талсайт. Ши ураңан туп вуты уцсам па тый тэрмаласам.

Щикуш Юра айдта потартас па лув сэмңалалн ищипа волаң падтап шиялаты рахас.

– Наң ин мана па парщин хот дыпийн ямпсыева нох муңхасыя па луматдыя, – яйл лувела партас. – Йиңка ки ант питсан, кашаңа йиты верытлан.

– Аңкева ши вер элты туп ал потарта! – парщин хот дыши элты Юра лувела такан увалтас.

– Анта, щит муң верэв.

Щиталн Толя ямпсыева луматдыйс, карты нялы вус, велщи кавартам лантшук амармас. Щит йинщемаман, такан ястас:



Хор: Зоя Курьямова

– Щикем эплаң па вояң дант мин кавартсаман!

– Наң манэма молты араткем дант па хая! – елды няхалман, апщел лувела потартыйл па такан эдал элты йиңкал нох муңхатыя питсас.

– Муйкем арат дантаң нялы наңена хайты мосл? – Толя яйл апщел ёхды иньщмал па щалта ияха няхты кердалңан.

– Хэй, хатлэв па иса илды педа манмал! – парщин хот элты ким этман, Юра нюхмас.

– Па хоты верты, манас ки, ши манас, – щиты апщела Толя ёхды ястас.

Овас пелак хоца туромн этна хуцад айдта этас. Ши тахайн, хота хатл илды педа охлас, матты ки вурты тутаң ратхар молты ёхатн нох вущитса. Ямпсыена щит педа аңкарматы ки, ши ратхарэн иса ванан нын ещалтан дойл. Лув туп ай хаш похлаң, пухар сайн ид ханемас. Рува олаң нох хуңхлан ки, ищипа лувел щита мошталэн.

Лант дэвам па шай йинщам юпийн яй па апщи парщин хотэда манлаңан па ид олты лэщатылңан.

– Щёса ши йис, – Толя ястас, щёсңалал педа вантман.

– Шеңк ям!

– Муй?

– Ши вер ям, хоты олаң хаталн хатлэн нох этал па кимет хатлалн илды педа охалты питал!

– Я-а-а, наң яма ши вер моштасэн. Хатлэн матты ки иса нэмолаты холта ант па манал.

– Пулңават вошн, алпа, ищиты хатлэн щутщаты вер ант па уял. Щита, ванты, овас мув йир.

– Щит ши. Ямал муван там кутатн шеңк ям. Щита кератман туп нюрмат, восты туром па нови хатдые. Ши тахаятн ин нови атат иса антомат. Туп хатл па хатл.

– Ант эвалдам холна! – апщел яяда ёхды потарл.

Щиты айдта илэм щёс парас. Етная ювам вурты хуцад, нэмолаты тахая ант тэрмаламан, и ай хаш похал элты кимет ай хаш похлаң пухра вуратыйл па щита ид водыйл.

– Ванта-са, – Юра ястал, – тылац туром хоца дойл.

Толя ямпсыена нови туром педа вантты питсас.

Яна ши, Ай Ас нумпийн, утца щиралн, матты ки нэмолаты хоята ант па мосал, тылац этас. Кашң ай ятые пилн, мув па туром кут мет новия йис.

– Ванта-са, матты ки Лорвошен ар пелак элты тутан нох вуцемаса! – такан Юра ел увалтас.

– Ияха Пулңават вош пилн, – Толя лувела потарл.

Ши кутн яйңан парщин хотан элты китомтак ким этлаңан.

– Ин хатлэн нох ши этал, – лавдасман ун яйл педа ястас па иса туром харыя вантал.

– Хэй! – шитаман Юра потарл. – Муши вошн хатлэн ши этас!

Толя яйл лув хоцайл кердал па апщел ясат пилн кашаңал:

– Яна ши. Муң вошев, ванта, еша нуманшак, рэп долаңн ул.

Мет олаң хатл ёшат иса машьяя дойты паварт хотата ёхатсат. Дый ишнилалн ялпа ёхтаман алаң хуцад ёнтад. Район куцайт хот нумпийн новивосты-вурты вотвой матты ки, иса вуртыя йис.

Илэм иш яйңан рут вошан педа умацламан вантлат па овас йир педа карэмалңан. Ши кутн хошам хатл ёш сэмңалада хатщал. Мет олаңан шеңк аие, щалта уна йил па талаңтэлн Ай Ас пелак велщи нох этам хаталн лап мохалда.

– Вуца, хатдые! – нох аматман, Юра лувела ястал па ёшан воциты кердал.

Толя, апщел педа вантман, ищи ёшалн воцемас па сора нюхмас:

– Вуца!

Щалта, ед няхалман, щиты потарл:

– Мин наңен тата талаң ат лавалсэман! Талаң щёс па хус минута.

Щитэлн яйңан тут аллаңан па шай кавартлаңан. Ялпа нох вуцитап тутые па пусаң онтасн ияха акташам пелдайт лакки пурдалат. Ай ёханые тум пелакн щутщаты ловат нох киллат па хув дый ратхарэл элты манты пусаң педа вантлат па ниңхарлылат.

Ешауд хатла йис. Сорни хатдые турма хуңхас па ат със потам мувал хошмалты питсас.

Яйңан акташсаңан па ёхи мантсаңан. Олты вошхулэт нумпийн ловат ниңхарты сый щашмас. Ши юпийн Ай Ас хоца тутаң хоп ед увалтас.

Павел Черкашин ханшам потар  
Владимир Енов толмацсалды

# Нампар вой па меңк ики

(Одаң шупал № 29 луңталн)

– Щимащ вер ки тыйс, мосаң, наң муң пилэван ищи меңк икен пилн лялястыя мандан? – нампар вой порд пилн лувел инщмасан.

– Ал хун мандам, шеңк щи мандам! – мохты дый пилэлн худ эватты сохал кашащас.

Щитэлн холдыена ай хопа дэлаплат, елды мандат па туп щиты арылат:

– Пулн кары хопиев поль-поль-поль,

Ов шашна сора-сора маныдылдув!

Меңк ики пилна ляль верлув,

Ищипа, ищипа нох питлдув!

Хув муй ван кут дый мандат. Щалта посл питар йиңк элты па щи молты турсый худлат:

– Хой, хой щит манал? Ил воляты-са па манэм нох талалн, иса щи йиңкан морсайм!

Щиканща нампар вой, пор па худ эватты сохал посл питара мантсат, йиңк элты волтап нох талсат па лувел инщаслат:

– Наң па муй щирн йиңка питсан?

– Ма инмунты меңк икена тый юватсайм, – волтапен ястас.

– Щимащ вер ки тыйс, мосаң, наң муң пилэван ищи меңк икен пилн лялястыя мандан? – щиты лув нампар войн, порн па худ эватты сохалн инщмасас.

– Ал хун мандам, шеңк щи мандам! – дыеда волтап ястас.

Щитэлн холдыена ай хопа дэлаплат, елды мандат па арыдат:

– Пулн кары хопиев поль-поль-поль,

Ов шашна сора-сора маныдылдув!

Меңк ики пилна ляль верлув,

Ищипа, ищипа нох питлдув!

Хув муй ван кут дый щиты мандат. Имомтыйн па щи турсый худлат:

– Нох талалн манэм, иса щи пошсайм!

Щиканща хопелн посл кутпа мандат амлакед йиңк элты нох таллат па инщаслат:

– Наң па муй щирн там посл кутпа питсан, муйн наң там вушунты тусайн?

– Ма инмунты додамты меңк икена тый курн шухсасайм.

– Щимащ вер ки тыйс, мосаң, наң муң пилэван ищи меңк икен пилн лялястыя мандан? –

щиты лув нампар войн, порн, худ эватты сохалн па волтапалн инщмасас.

– Ал хун мандам, шеңк щи мандам! – амлак дыеда ястас.

Щитэлн холдыена ай хопа дэлаплат, елды мандат па арылат:

– Пулн кары хопиев поль-поль-поль,

Ов шашна сора-сора маныдылдув!

Меңк ики пилна ляль верлув,

Ищипа, ищипа нох питлдув!

Хув муй ван кут дый мандат. Имомтыйн па щи турсый пан питар элты худлат:

– Манэм йиңк, манэм йиңк мияты!

Нампар войе ёхлал пилн пан питара хойл, ай лар худэл йиңка тулэл па щиты лувел инщаслат:

– Наң па, лар худ, муй щирн сорам пан питара питсан?

– Ма меңк икена



Хор: <https://funnyart.club>

там сорам пан питара курн шухсасайм па тата нох сорты парсайм!

– Щимащ вер ки тыйс, мосаң, наң муң пилэван ищи меңк икен пилн лялястыя мандан? – щиты лув нампар войн, порн, худ эватты сохалн, волтапалн, амлакалн инщмасас.

– Ал хун мандам, шеңк щи мандам! – ай лар худ ястас.

Щитэлн холдыена ай хопа дэлаплат, елды мандат па арылат:

– Пулн кары хопиев поль-поль-поль,

Ов шашна сора-сора маныдылдув!

Меңк ики пилна ляль верлув,

Ищипа, ищипа нох питлдув!

Хув муй ван кут дый мандат па посл питара щи ёхатлат. Вуты хойлат па вантыдылат, хоты посл питарн и ун наңк юх павартат элты верам хот омасл. Ин нампар войе нумасл:

– Алпа, щи хот хоща меңк икен ул?

Щалта лув пилэлн ёхтам пилъёхлала щиты ястас:

– Нын, ёх, тата хащилдыяты-сары! Ма яңхлам па вантлэм, хой щи хот лыпийн ул?

Щиталн сора ед нёхамтас, паварт хот пуңалн мув хиром-

тас, дыпия доңемас па вантлалды: нэмомты меңк ики ший антом.

Щалта ёхлал хоща хухалмас па дыел вохсалы:

– Ёх, манлув па хот дыпия доңлдув, меңк икен ёхи холна ант ёхатмал!

Щ и к а н щ а холдыена хот дыпия доңлат па нампар воен щиты дыеда ястас:

– Ма щимащ номас тайдам: наң, нёхлаң худ эватты сохал, ов питара ода! Хун меңк икен ёхи доңал, лув наңена пурмал па ил волкомтал.

Наң па, пор, ов нумпи норма ода! Меңк икен ил волкомталн, наң лув ох патэда наварма па муйкем юр тайлан, лувел порыты. Наң па, амлак, ов хот луңка дэщатыя! Меңк икен ил волкомтты порайн лув сапдала такан ёвартыя па ил лувел талды. Наң па, волтап, ов пуңал норма ода!

Хун амлакен ин икен ил талдалды, наң меңк икен шанша наварма па лаңкардал элты илды педа такан волты. Мин па лар худэн пилн щёхал шанш



пелка ханятылман. Наң па, лар, меңк икен нёл вусата доңа па такан щитчалал пеланталн!

Хун па лув уңал вусал пелки талал па увты кердал, ма лув хон дыпеда навармалам па самдал муйлал катна эватмалдам! Ин па, ил ханематы па шитама улалы!

Хув муй ван кут парас па ин ёх меңк икен йиты сый щи худмалат. Тумен такан увман, ёхды педа щи шушал:

– Ма мет юраң па мет номпсаң! Ма иса нампрыя маншдалам, иса ая шукатдалам па ёхи дэлдам!

Ин меңк ики ёхи щи йил па парта пелак ёшадн ялпа ведам хор тул. Хот пуңдала ванамас, вулэл ил вощкасды па нюхмас:

– Мандам-сары, щёхалэм алдэм па дэтот кавартлам, самем щикем вохлал!

Щиканща меңк икен ун юхаң алтэл вус па хот овада ёхтас. Хотал пелки пуншмасды па туп нёхлаң худ эватты сохлала пурмас, мохты илды педа щи волкомтас. Ин амлак ов хот луңкал элты лув хощайл навармас па сапдал элты ил талтыя питсалды. Щи сысан порн охпатэл элты порытты кердаса. Меңк икен роман ел увалтас: «Ана-на, ана-на!»

Щиталн лар худэн лув нёл вуснадала доңал па такан пелантты питчал. Ин ики уңдал пелки талдалды па нампар воен лув дыпеда навармал. Щалта меңк икен хоналн самал муй мохлал иса нампра порсалды. Щи ураңан ин ики ищи куромен сорма питас. Нампар воен уңал мохты ким этас па ияха ёхтам ёхлал педа щиты ястас:

– Ёх, вантаты, хоты муң щи доват меңк ики ияха охалтасу!

Тамиты, ванта, улапса щирн тыйл: хун ар ёх и номасн ул, па и вер лэщатл, щит ищипа нох питал! Щи.

Владимир Енов  
ханшам монц

## Куртаң улапса


Шеңк умась вантты, хун улты куртатан, хот водат сыстамат. Луң порайн вошлув па куртлув мет хорамадат: дыптаң юхат, вош хулатан, сютсяты тахаятан дыптит омасман улдат. Умась вантты.

Там мосванан Дорвош район Асован усам. Си кем ай, хорамаң, сыстам куртые. Вещкат, самаң па потраң хоятат улдат. Курт хуват нохар юхат энамлат. Хот пуңадан картопка харат, муң мувеван ант энамты юхат, ар хорпи дыптит омасман улдат.

Сикем сам аматал, хун симась хорам куртыет вантлан. Там лопасан си мувеван верам хорат умасьдыядан. Муң куртлудан улты хоятат, кум ки тайдаты, хот вод харлан хорамаңа дэсятадан, дыптит омсаты, сюрнет энамлатты. Вантты порайн, сэм ат аматал.

Альбина Тырлина  
ханшам потар

Куртаң хоятат ар вой энамлат. Ар хотгэдат войт тайдат: мисат, доват, оңтаң ошат, дунтат, васэт, сись-курэкат па перепёлкайт. Арсыр сюрнет каман па теплицайн энамлат.



Хор: Альбина Тырлина

### Газета «ДУХ АВТ»

Адрес редакции:  
629003, ЯНАО,  
г.Салехард,  
мкр. Богдана Кнуянца,  
д.1, каб. 106  
(34922) 4-68-63

E-mail:  
luh.avt@yamal-media.ru

Учредитель  
Департамент внутренней политики  
Ямало-Ненецкого автономного округа  
(629008, ЯНАО, г.Салехард, пр-кт Молодёжи,  
д.9, каб.708)

Газета зарегистрирована  
Управлением федеральной службы по надзору  
в сфере связи, информационных технологий  
и массовых коммуникаций по Тюменской  
области, ХМАО-Югре и ЯНАО  
19 апреля 2012 года  
Регистрационный ПИ № ТУ72-00558

Тираж 1340 Заказ 1040  
Подписные индексы:  
на год – ПА700, на полугодие – ПР561

№ 30 (1229)  
Газета вышла в свет 27 июля 2024г.  
Подписано в печать 25 июля 2024г.  
по графику: 16.00  
фактически: 16.00

Газета выходит по субботам

Цена годовой подписки 88 руб.,  
в розницу не распространяется

Издатель  
Департамент внутренней политики ЯНАО  
(629008, ЯНАО, г.Салехард,  
пр-кт Молодёжи, д. 9, каб.708)

Отпечатано в АНО «Ямал-Медиа»  
Юридический адрес: 629003, Ямало-  
Ненецкий автономный округ, г. Салехард,  
мкр. Богдана Кнуянца, д.1, каб. 106

Фактический адрес: 629007, Ямало-  
Ненецкий автономный округ, г. Салехард,  
ул. Чубынина, 39А

Генеральный  
директор  
АНО «Ямал-Медиа»  
Зулинова  
Марья Андреевна

Главный редактор  
Яковлева  
Алина  
Кирилловна